

國朝常州駢體文錄

國朝常州駢體文錄卷第二十目

萬善花室文下十八首

陽湖方履錢彥聞

河內縣志敘傳

徐仲平原學六篇敘

重刊法苑珠林敘

周伯恬詩集敘

蘭石齋駢體文遺彙敘

仙山塵夢圖敘

懷知圖敘

陸祁生宣南話舊圖敘

贈陳丹崖敘

送趙林一敘

春算遊陶園敘

與董方立論古泉書

荅陳伯游書

江行記

陸母林太孺人家傳

董方立誄 并敘

鄧完白先生墓表

文林郎湖北東湖縣知縣洪君墓碣

敬業述事之室文一首 陽湖方駿謨元徵著籍大興

同治徐州府志敘錄

國朝常州駢體文錄卷第二十目

國朝常州駢體文錄卷第二十

萬善花室文下

陽湖方履篋彥聞

河內縣志敘傳

代作

大矩既兆形束壤制阜陸紛布廣輸周達其土有堅壚偃
瀦之異其氣有暑寒陵衍之殊凡民之生剛柔燥溼各安
其性言語嗜欲皆應其類是以隸政施教必因時順宜以
利導之察陰陽向背候序遲速之度循原隰水澤肥瘠高
下之宜因其所喜以勸善因其所惡以禁姦勿繩之以所
不安勿恫之以所不知夫楫雖利不可以逾領輻雖廣不
可以濟川權衡準繩異形而皆施丹青膠漆不同而皆用
勢各有適物各有當此爲治之軌不可替也昔者文命之
聖區別九州定其山川分其圻界條其物產辨其貢賦降

及姬宗六官分職司書掌邦中之版土地之圖司徒以土均之法齊天下之政通訓道方志以詔觀事道方應以知地俗司險達道路保章辨封域皆總於冢宰以成六典之治周之中葉典籍未亾故我夫子取百二十國之寶書以成春秋漢時計書旣上太史郡國地志固亦在焉劉向略言地域張禹使屬朱憲條記風俗班固因之作地理志晉摯虞作畿服經其州郡及縣分野封略事業國邑山陵水泉鄉亭城郭道里土田民物風俗先賢舊好靡不具悉其書已亾後之學者但宗班氏而已若陸澄之所纂任昉之所增唐李吉甫元和之編宋樂史太平之紀皆總括寰瀛僂於國史下此如潘岳之述關中王範之錄交廣雷次宗獨詳於豫章顧啟期遂傳夫婁地江源士女雅行可書扶南風物殊聞咸紀雖偏采方隅襍陳簿錄皆足以達情諭

道辨物類名詮動植之詳喻勸懲之旨使夫遐陬單壤曩
厥嘉產登之冊府揚於天下而履其鄉者繙帙啟疏殫察
利疚如闕藪比之中而通其苛燒怡愉之意於以惇禮而
拯性頒憲而糾俗執其臬守其經以求砥於大同胥繇是
矣我

朝聖緒丕承焯燦滄懿元鈞駁模乾奠坤謚餐化羣倫迪
鯀泚禱擊拱大常覃洎乎四垠九荒莽買沈墨稷愼大塵
莎車挹婁舉厥駢踵之倫靡弗昌樂肉飛蓋蹈首向王會
之圖重譯之紀僉陳於職方惟

聖天子設象以爲民紀搏本肇末比綴以度尤令區夏一
意同欲連屬其情秩之載物故憲典昭著命守土之吏典
脩方志以時罔怠所以齊統服并質劑法至美也河內之
爲縣延袤雖僅百里而介於河朔地近宅中首絡太行澤

路之所控也。捭河陽，倚溫原，南臨邛洛，東延鄴魏，沁丹以爲洫，白堊以爲隘，風候和，徹土澤，膏茂，輟轍四達，沃野平曠。自漢以來，世治則爲殷阜之區，有事則爲據衝之會。故多往蹟，遺趾載於羣史者，尙可攷見。其民敦愿，以謹率義，向方碩儒，文人遺風，未泯鄉曲之間。孝友廉讓，貞苦卓立之輩，不待聞世而生，不可謂非雅邑也。某以虛薄之才，忝焉承乏，振轂平皋之右，褰帷武德之原，矚山澤之雄秀，喜閭井之蕃滋，振裘挈領，莫知其端，敗駕傷錦，默而思懼，是用稽前誥，求訓典，揆今以觀古，由邇以度遠，而故乘荒蕪，遺聞散佚，舊所存者，非有闕駟之精，博賈耽之勤，蒐漏所應詳，登所宜汰，援引鮮據，外互非一，況時逾百年，未經復脩，月成歲會，久而無徵，潛德幽光，湮而莫舉，遂使文獻之域，同於最陋，老成旣謝，典刑蔑如是，可慨也。某以先務是

急不敢諱其疏愚竊有脩輯之志迺歷考史籍以定其規
廣覽篇冊以求其備搜碑碣以辨其異同取公牒以證其
釐革延邑人之耆俊俾陳先德之所述進都鄙之耆長使
達惇獨之所行積之朞月舊章差集然後授簡於友人方
君履錢吳君育削絲摘要斂華賁實經之以事緯之以文
適前何東觀察劉松嵐先生縣車養逸主講懷州因得就
正有道加之刪訂乃有成書通謹按河內之志創於明萬
厯二十五年知縣洪洞盧君夢麟而邑人王方伯所用時
始舉孝廉實佐其事盧君爲之敘略曰世無不志之邑無
志者獨河內彼爲其附郡郭凡當志郡志總之矣然則他
外屬非總於郡乎無志是無河內以是綿邑者深思之而
前令解州侯公實勗爲之考索故典網羅逸聞屬孝廉王
君次弟其書適侯以故去役遂中輟不佞至此逾二年而

始討舊事以終盛舉更期年而脫艸剗畢役河內於是乎有志志成於是乎有河內矣夫不佞非敢爲志也仍前政之舊以成其美無亦爲侯公與余同意氣哉睹河內枕山扼河據孟津之上節俠孝義代不乏人 皇代建制規模宏遠諸城堡官師戎政夙絕前代文學繇興簡帙增輝而區區所僭陳於搢紳先生及父老子弟者則惟日風俗其自今敦好尙景行前休使此地人文視昔有加以鳴國家之盛以無空斯志則不佞與王君之所大幸也志今已佚但求得其敘如右越六十一年爲 國朝順治十五年知縣大興孫君灝奉中丞賈公命脩輯延邑明經王君玉汝爲之屬筆王君卽方伯所用子也未竣而孫君去任繼之者晉江林君環昌復與邑人刑部郎中蕭君家芝參訂授梓時順治十七年也又閱三十年爲康熙二十九年巡

撫閩公興邦檄脩邑志時知縣事者爲南海李君標亦延
邑人戶部員外郎蕭君家蕙歲貢生史君璉廩生蕭君健
同庀其事至康熙三十二年功始竟又閱一百三十年爲
龍飛道光之三年其夏四月知縣袁通始自汝陽遷劇河
內明年正月志事始舉而歲而畢卽捐廉奉付之梓人至
五年三月其工亦竣凡爲書三十六卷嗚呼通之先人以
魁偉絕特之才彌綸經術錯綜藝文早膺特徵繼擢甲第
入校祕書出宰上邑播德宣惠異政洽聞初莅建康歎其
志乘之疏廢乃覃思扞藻纂若干卷刊臧官曹以爲彼邑
之典式通無似不克守先人之學而幸竊微祿從事此邦
尋繹緹素編采故實亦獲與賢士大夫共觀厥成小子何
足以知此其亦猶先人之志也夫其亦猶先人之志也夫
乃爲之敘曰

文德鴻昭天章雲會月山梵勝寵邀玉軌魏君御射唐宗

新誠孰與

聖謨炳煥百代

臣通

謹述

聖製弟一

中區豐壤縮河鑰山野王故都衛角所安漢稱巨郡宛路
是環唐始置邑昔名未刊二郡五縣遷易旣絲或綴或屬
隸於郊原是爲浩穰星絡綺連竹柏妙遠黍禾滋蕃開方
計里呈於簡端述縣境圖弟一

附路之精阜彼峻嶒峨峨縣隘權輿八陘竦嶂含蕤複岫
舒屏天井旣闢地肺載凝述縣境諸山圖弟二

銅鞮濫觴脅穿太行石門始啟壺浸千里遏堰疏渠不均
上腴述沁河圖弟三

源源之水來丹林沙麓九派漸碧潯二十五泉衍其檢滋
漉所達珍如金慎勿汎溢愁黎黔述丹河圖弟四

沈有東支乃潤我懷仁瀆恬流涓涓滂滂穴郭通脈澂源

鏡開述濟河圖第五

崇墉匪廣河朔袷喉名山枕堞平渠浹雷雲氣曠靄衣冠
所游劫之輦之以奠爾陬述縣城圖第六

勿謂傳舍夙夜思虔無以隸之荻障猶愆阮生曠朗朱穆
貞堅景行克仰孰與媿肩述衙署圖第七

璧水環林清穆是崇懷經登降束脩禮容述學宮圖第八
區昔壤纘史事繫以表罔不備羅百代誠簡易附沿革規
往志述紀事沿革表第一

位惟鄰民如弦貞直哲人宣勞彝典罔斃惟彼不讓俾民
大棘野王建治歷筭嘉德厥惠勿諉名乃永植官師之錄
俊庸並列後有君子是懲是則述職官表第二

周武之穆始啟邗封湖漢泊宋或王或公元君斥居入紹
太宗鄭藩在明九傳乃窮述封爵表第三

韞價藪澤充秀邦閭鴻毛順風揚袍九衢子禮額經遂舉
高弟先達可懷醇脩允繼既貴名騫又思德副由庚在詠
勛哉衿胄述選舉表弟四

營室東映井竿億臻爲締爲鄂繁古名存分畫保圻以諭
遂人述疆域志弟一

太行幹麓傑僂千墨東委金徽西起蛟脊漢泉徐衍如津
貫嶽經山緯川比於桑鄴述山川志弟二

晉風福晉衛俗織儉酌和安雅禮教相染珍藥盈畦夏禾
萬鍾爾田爾宅土物土風于于敦愿以洽大同述風土志
弟三

五行淑慝偏鍾一闕休徵咎徵時與地殊於鑠 聖代羣
休合符頌呈瑞麥歌集康衢述祥異志弟四

肥壤萬頃水田十三明季倍征罔顧民瘼 皇朝均賦農

食始厭計粟納算以養以恬歎則蠲恤惠澤益覃述田賦
志弟五

懷有神令時惟袁公疏巨浸脩曲防奪彼斥鹵生之稻梁
達闕畜流毋怠厥功述水利志弟六

明禋舉矣嘉薦饗矣爾主百神亦職有常矣棗盛芳醴敢
曰惟馨何以格之時和歲成述祠祀志弟七

魯齋雅化膠序如林釋耒以趨束帶橫琴河朔剛氣冶爲
南金詩書之澤蘊而彌深述學校志弟八

公家之役民力是征今茲建耆皆上所營三時弗擾百堵
以興補完治敝毋隳厥成述營建志弟九

光武帝業時此而雄形勝之域戎轂蔽衝塢壁設屯三十
三所何如寇公居若臥虎乾宇晏安武備亶脩磨嚴玉帳
坐奠金甌述兵防志弟十

阪日羊腸臺名射犬古人不作遺鞍未翦官官仙觀闕
梵庭駕言出游據我幽情述古蹟志弟十一

中郎入吳迺得詩細茲求鄉宸往冊多翳采輯經論襍錄
傳記甲乙篇目編以世次述經籍志弟十二

河朔片石珍瓊瓊驚龍妙畫開奇壘杖幽欲起韋仲將歸
山金累呈瑤光誰歟祕此雲錦章述金石志弟十三

玉溪麗藻振轡今古餘膏腴馥揚鱗羽燦然高詠緬爾
元矩屬辭比事軼文咸舉述文詞志弟十四

安仁孝若尊風賞流惟袁鳳翔實勤大猷才克禦亂子房
最優尸祝奉嘗春社秋牒式諮雅範願企前脩述循政傳
弟一

肩道援溺嗟許與何銀管可縷白圭不磨藹藹粉榆子子
蓬麻百步懷香十室忠信幽燉具昭植躬宜峻述先賢傳

弟一

孝爲文本義乃穆行所居心化如響斯應沁水之陽獨楓
之里實產丁郭肫肫素履幽顯能格百世奮起述孝義傳

弟三

志膽在躬天地改色齋命蹈義若饑就食習珍登陴易雄
馳勦一節慨慷百代廉立述忠節傳弟四

霜條空谷貞禽不擾土有遐心蟄居塵表名隨迹削氣爲
身寶羣驚羽人野王二老述隱逸傳弟五

運期遠游文若避地樂土可遷是焉僑寄述流寓傳弟六
技進乎道貴爲世用棘猴取織木獻徒控甘石俞跗精傳
孰貽機神獨蘊遂炫魁崎述藝術傳弟七

中閭之操達於紫閣冰井夜朗漆帷晝昏孤鶴翔雲女貞
在原過閭則軾有祀必騰述列女傳弟八

鹿野勝因龍崎靈族俱空萬有自守真獨太行石髓挹之
盈掬玄鑰可探塵迹誰屬述釋老傳弟九

析設間麗簡未列宄行寓屏黜述志餘弟十

藝文胥該典物差究民生勤窳山澤延袤實事求是闡微
章舊懲勸必詳攷見或囿大雅嗣音匡厥譴陋述敘傳弟
十一

徐仲平原學六篇敘

夫陳力之效有殊而致道之功則一惟其燭幽昧者非揚
輝無以明擇良材者非曠括無以正是以賢哲之士惜陰
程業究典略之奧而忘饑渴之患證傳記之文而息榮顯
之志迫其用之則又事必師古言則稱昔絲舉博引執矩
尋繩無獨是之見鮮悖道之行雖龍蹲之聖猶著二色之
勤鴻飛之宰尙取百篇之益才不逮是而日不學而能則

未之敢許也世之與才若形神之相附而庸闇代增睿識日寡豈不以逞己者眾而驚學者少乎受性於天各有所限求知於學探之益深而後世之彥詮性道則以穎悟爲能好詞賦則以剽取爲法言當務則舍案牘而未由炫才用則肆臆論而不愧試以天下之大要眾人之所疑非枘鑿而難行卽睚眦而無策豈今昔之異途實學術之不立也吾友徐君仲平夙質多通好尚不惑鑽堅研微實事求是少受師友之誨長切爲學之方益懷之素衷四十餘載然後增益舊聞游泳新得涉筆著論爲原學六篇斯文也去糟粕之餘絕漫漶之失極其精以窺往聖之指挾其要以誘後至之心識廣而意周言近而道遠可以啟千載之祕不獨成一家之言也桓譚讀太玄謂爲軼代之書沈約見雕龍許其不刊之作余於此文亦有至賞研尋反覆日

不能忘仲平屬爲之敘自以無中郎之譽立晏之筆慙而不敢作者又一周矣將有遠別輒加論究且於仲平之說將有進焉夫爲學者體有三尚一日遺俗二日審時三日定志夫持卷之士多羅貧悴故必有忘得失輕富貴之致使朝披竹簡已覬黻冕之華夕解韜繩乃羨金穴之厚紫標黃榜有識所嗤斗酒隻雞於義不足言旣無微道同塗說其蔽一也先聖後聖文質不齊安越安楚流風斯易必欲舍琴瑟而陳黃鼓鼙棟宇而就營巢效周官者或至阨危摹大誥者遂同傀儡此則師古之誤實由於師心信書之過不如其無書也其蔽二也知二之質鄰於庶幾已百之功廢於造次無樂恢開廬精誦之勤而有朱生博通眾裁之志簞食瓢飲苦終歲之資編蒲緝楮非一蹴之力間而輒怠好而不專其蔽三也嗟乎讀書之遇已逾古人天

賦之英多在同輩而使悠悠歲月遽馳於寢興巖巖意氣
終淪於艸木不能絕人間之酬答希至道之閭域屈指以
計遂無一賢束書而歎坐慚千古余於仲平各有所蔽知
而不改夫將誰尤來者可畏其終有冀乎

重刊法苑珠林敘

代作

式仰稜伽首崇調御青蓮煥相之辰紫山寄莊之始髻湧
百寶睫照四天吉祥之瓶廣納赤宙智慧之藥俯接黔岷
莫不因妙以立覺藉寂而探機設教止乎一慈建諦俟其
頓悟上行所屆微言已伸復以三界昏寢六賊攀緣鼠入
角而焉通狼守齋而易毀於是轉意珠之朗揚慈水之澗
吐奧旨以拔迷根積雕談而指險樹芬逾蒼葡夢發優曇
雖四十九齡未拓般若之義而三十二士各示依趣之階
無說無聞天花早墮非堅非久蠟印自傳白馬剎剎羽林

之使初歸神龜肇年洛陽之求益備乃使九乘大典西辭
乎流沙八梵唄音東詹乎震旦自迦葉口誦之文菩薩淨
行之品觀驪龍而豎指逢饑虎以施身請雨有經移山著
論至於辨意長者成貝字之篇善思童子效琅函之誥咸
敷精業婉迪羣蒙加以前皇黼辰喜闢勝因儒生綺豪樂
爲釋用梁帝重雲之講旣耀南區姚氏艸堂之集實隆北
學鼻柯之所宣譯羅什之所發明彥和燔髮編定林之經
滅小山潔願獲開善之香匳由是縹表繡璠金繩密約莊
情束景之詞啟繆開賢之制足以躒靈飛之綠檢抗聖籍
之丹籤列棟連薨浮煙散竹語夫博涉從事斯難索彼菁
華情徒莫憶乃有沙門釋道世者植鞞唐代應詔西明學
通內外詣合教宗擬彌天之道安爲方袍之平叔愍夫眞
如易晦法匠難遭遂乃綜覽義林穴穿奧曠舉其綱紐明

其指歸闢八賊之鍵挈一裘之領大乘小乘之別幽顯俱
詳語業意業之闢源流可溯如酥就軌億轉不慮如水散
泡千沫其見百篇之目旣析四禪之用皆純若其敬攝旃
檀聿宣慧炬日精入口住白淨之宮月愛舒光孕青霄之
座鐵豬受矢玉象扶輪獨守心王不離智食富樓那之姓
氏標若星躔波頭摩之劫壽羅於紋掌欲使維衛威神感
而卽應尼乾邪計望而輒摧此則僧祇之本律亦讚述之
願海也因以瀚濯塵冥解脫頑固七珍勤表五濁泛陳以
蓮舌爲振鐸以細素爲長桴汲汲苦言悵悵淒韻逆風蕤
嫩懲導欲之心行廁畫瓶泯惜身之念四蛇引於鼻耳二
鼠逼於腎腸凡諸怖畏足起信心倘使鉢露能濡自無酸
酷嶭雲獲蔭豈遇嬉煨敲骨剔髓之誠濟生非恡鞠土雇
花之細得報靡窮巨障裂而長空明深痾竭而凡劫盡此

猶禦寒之設諾拯渴之蘇陀福利之階斯爲最要至若曲
辨情靈富該圖史縉英彬蔚麗篆紛綸事多集於佚文語
每秀於天拔誰圖異迹香散驚精馬苑餘輝華飛纓絡求
黃縑於安慧神漢浮來夢白服於曇延夜光照徹興公銘
頌遜此芳塵休文碑狀媿其妍製多聞親授阿難爲之展
輪總持強記摩詰於焉避席信可以梯杭眾品肴覈橫書
蠶藻者珍比青箱饋貧者非徒黑學宜其千禩不刊三教
傳錄者也世所行舊槩本曾經明人竄改妄增百卷爲百
二十卷以致簡葉違錯文義晦離點畫之間更多脫誤邢
子才之一適非可例觀賈慧遠之五論難期間合披卷尋
覽能勿慨然清信女士董昭虞山蔣大令伯生之筵室也
生善女天號仙人子珉膏飮齒石黛脩蛾悅意馳稱妙音
作眷縣金九十日爭譽便娟載車五百丸皆名歡喜流離

研匣不犯綺詞迷迭薰鑪潛持密教因以梵夾校證此書
始知今本之訛迥非前人之失丹鉛旣久縉論悉明遺發
宏心謀資眾悅同時名閨淑儀大善知識咸分華鬘襄助
銀梨共得百人費凡千鎰摹勒精審攷析激嚴曾未而歲
鑄訂訖功福不唐捐美冠諸蘊阿育建塔受風世之慈緣
瞿夷獻花遶閻浮之良匹寶髻尊宿之前六門開示優婆
塞夷之侶四諦顯揚竟令佉樓半字易劣行倒住之風珠
藥全勝播辨物類名之訓成一切種智爲三界導師具此
淨因超於戒垢天銀闕下鶴女無遇辜之經水香園中鹿
母迎善見之律十重緹褶偕慧日而齊暉五色霞賤垂法
濤而愈永興言褒讚聊敘毗尼心塵未離空懷彤管身田
被潤欲丐青茆雖來旨之勉酬慙覺緣之終蔽

周伯恬詩集敘

竊聞平陽逸奏雲谷和風八律載宣七鬯斯永嘶雷門之
鼓凡響皆沈登郢人之堂楚飲不復所以追琢神思含吐
懷蘊烟霞爭采金石助奇代既燼及流音漸渺握靈蛇之
尺珠騁駉驥於千里雖光溢乎後乘塵駛乎前驅而志有
盛衰聲有小大陋厥古觀靡於新韻裂錦爲華惟工雕鏤
取材失慎鄙於俳優戶執寸編家傳百笥揚雄是以有小
道之嗤劉勰是以急明詩之辨也至於精駑遐馭心遊芬
苑引墨自合運斤易施振徽播烈斯其尚矣吾友周子伯
恬娉節外昭脩能內茂虛融已勁久峙青雲華姿無倫終
隱玄豹浮邱挹襲重孝綽之清儀蘭臺絕塵推彥升之藟
藉瓊瑰映於江左鸞鳳唳於層霄杼軸典甄發諸觴詠一
室自得揆藻於天庭十年操觚綴端於青簡偉麗之兆有
可言焉則惟南軒晨張北牖夕啟坐圍彤籤几拂瑤管淵

情指睿哲之徒冲袞攬江海之契八儒三墨馳赴腕節一
唱再歎脫穎齒牙含豪嫵婉翹首綢繆碧薛區牆芳華在
樹風雨之夜清琴初調尊酒之前故人獨往悵候緒之間
寂益踈躅於子懷欲抗衰而緩吟遂放言而不已又或太
冲延賞開詠史之流醴陵絲憂多則古之什月且千載使
撫心而悲涼孕育百家爭聯手而款語薜蘿美人之曲招
楚臣於瀟湘芙蓉初日之篇近謝家之池館魚龍襟舞陵
壑齊鳴吹笙鼓簧我散子佩往軌之所相荅汲綆之所自
娛至於鬱鬱不樂遲遲有行歸辭干日薄遊萬里駟玉虬
以遐征駕蘭查而直上乃躡東岱之顛問河西之渚赤城
窈窕遍摩秦室之碑劍閣崎嶇猶喚蜀王之鳥垂星在袂
奪雲入懷瓊巖畱題玉洲聞嘯句成秋水寄迹馬蹏筆隱
春霞新迴牛渚靈運之雅律川陸惠其無窮郭璞之山經

神鬼居其大半少時壯概讀之而魂飛世外奇言編之而
心攝者矣因而挾冊出走正衽而來京洛之浦祕簡傳觀
公卿之間昨舌相告入阮瑀之座十萬縑而先韋侍孔融
之杯九千言而爲擊柏梁合製鏗鏘嵒壁之諧南皮勝遊
商郁山雲之起終朝所詠人盡輸籌旬日少休錄已盈篋
涉獵之盛尤爲最雄若夫葶邨秋早蓮陌春低湖頭棄佩
顧影湘君峽裏牽裳怡神織女左徒瑤情通於日下流波
翠瑟何事人間桃華驂冷贈子以木蘭楊柳橈輕思君今
逝水則有將離善怨芳艸含光譜錦歌殘迴文敘短宋玉
傷心之賦秦嘉寄婦之章莫不泣沅澧之征鴻和洞庭之
唳鶴豔骨猶憐餘香未沫其瓊思也若此其摛藻也如彼
雖紫鳳之英辭碧雞之雄辨舒向淵海之宏樓岳丹青之
韻皆已執策遜其風標挾楮嫌於篆刻也自王子歲訖於

乙丑日惟雒齋集凡十卷自下而歲訖於癸酉日之福居
集凡八卷昭明集富纒逾壯齡會昌纂成尙多後錄時行
時止追伶竹於蒼隅愈唱愈高奏洞簫於天末日之方升
銖之益累長寫不測亦孰知其所抵哉然而攬申椒其不
芳惟蕭艾之匹也望鷺鳳而戢鳴亦鷺鳩之好也願盼萬
古俯仰天地長褻善舞短歌易瘖中年哀樂過太傅之沈
思身世流連同開府之多恨依遲春日曠放江南對飛花
而銜笑聞流鶯而感時歡筵並坐五日無聊魯酒獨持三
星未落愁賦初罷越吟乍舒早有遐心以永今夕此何故
也斯其悲矣夫以吞吐河漢之豪摧折迴纒之勢倚摠賈
董之行詆訶曹劉之作躡九華而西傾抗八極而東覆搖
筆而熊羆晝呀發聲而蛟鼉夜走乃志士之盛概文人之
逸情然能退臧於密處盈於虛引和宮商酬應韶濩情之

所極則言無不周意之所通則韻無不茂報星漢之昭回
視風日之駘蕩則蓬山可達不羨尾閭芸觀爲羣靈誇下
里豈不至哉是所望也蒙也幼睽圖史長慚淵藪雍門肆
響祇愛繞梁瓠巴安操惟知仰秣以山陽之款密識元凱
之平生命書集首因志儷詞亦惟南斗晨暉揚秕稗之先
導黃鍾初應舉瓦缶之虛聲云爾

蘭石齋駢體文遺彙敘

嗚呼此吾友董君方立之遺文也寒谷曦沈霞綺絢乎
天半涸溪泉咽滋漉達於重埃吐腸之夢已識生前鍊肝
之言猶存斯世蓋賊年損壽職此之由而浮煙斷竹將以
託命也誦偉長之中論鬼錄難追荅劉沼之遺書宿艸已
列淪也痛惜可復道哉吾始羈隸交君伯仲縱獵道藝研
推玄史難膏熒熒繼於朝旭棋室寂寂幾忘足音旣欣同

志俱好纂組遂欲發蘭臺之奧府奪陳畱之重席上析潘
陸下綜任劉勤身奮志顯光氣於寰中環詞綺章操雅麗
之絕格清尊互賞連襪偕游噓靄生雲飛藻如雨揚裊高
詠仰屋苦思對景竟日爲歡彌年而君尤以天授逸才筆
多奇采公明洞識乃雲龍之精伸舒屬翰比烏獲之勇華
情驟展驚辭橫溢初攬豪素春花滿堂舉映曉端秋露染
翠彥龍似有宿構蘭成疑其復生不特吾之庸沓無以匹
之卽二三友生及君之賢孟皆有拔俗之妙蒞軼羣之麗
篆亦自以爲瞠乎其後也蹉跎塵勞歲逾十稔鳴轂華阜
之陽振裾京輦之下人事牽迫襍憂紛撓而脩學益勤沈
思獨往食鱗餒以求尺間坐繩牀而參祕義窮化機神探
蹟眾妙九部五時若指諸掌百帙千名必穿其脅治積矩
之經則黃鍾應律考地訓之志則赤墀陳圖信都覃慮不

聞雷霆張衡制作欲侔造化此則阮咸孤詣爲荀勗之所
深折羊殖屢變非成搏之所能知矣吾嘗謂君曰僕學者
畢生之選功文章者不朽之盛事以子雋異之質潛心微
眇之際鄴文茂記投閒而作豔柯絲穎祗實相宣足以寫
盪性靈扶露膏澤勿謂鴻儒優於文人而輕棄其照乘也
君瞿然曰吾將挾昔人之隱以祛鄙衷之惑擴其識絜其
志總其指歸明其象數然後發皇經緯沈洋適己以副於
文庶有成乎子雲篆刻非敢有悔戢子良箴子其待之嗚
呼舊說始定郭路有絕脈之傷講授不休鄭灼無鎮心之
物桐根半死無假烈颯駟隙一馳遂成永夜蓋靜氣旣動
而魂魄易幽玄理盡剖而文采亦終闕矣凡所誤述四十
三卷皆足刊摘冥奧討濬學源而吾之偏嗜尤在斯文冀
速章其微言以少酬夫夙願迺求遺藁屬諸梓人嗟乎此

特安石之碎金相如之玉屑百南都一賦豈盡生平北海
萬言未陳梗概視三旬之餘響郢歌已遙覽干仞之德輝
鳳飛不復然而杼軸物表氣韻天成儻不害宛繆而有則
袁陽源鸚鵡之篇推爲獨秀王元禮芍藥之賦傳於少時
不可見其洪輝之未泯超步之難輓乎吾久墮落文質靡
歸斷金往契咸罹貧瘁卓爾之志將廢斐然之作無聞校
崔生海岱之記差類徐寅述衛恆汲冢之書慙非束皙穎
川斗酒微聞十字之吟蜀郡玄文聯證千秋之業輟斤絕
軫輒復自傷執簡悲來泣然而已

仙山塵夢圖敘

吾友楊子劭起以所作仙山塵夢圖照相示命系以敘余
觀其爲圖也繒翠一闌縹紅十尺裁瓊鎖軸鏤璧簪榻展
芬溢指舒藻說瑰琦樓曲曲天桃結牆雕扉重重垂楊綰

鑰甲朝未起風迴小苑之東午夜初陰人在闌干之北加
以春凝裾遠月擁鬢來浣紗湖畔背手微吟姑射山頭顰
眉善怨羅塵滿鞦韆映蓮花之一叢細骨牽裳賜眞珠之百
琲天孫織館海燕窺梁王母歌臺青鸞奏曲珍之所萃中
有人焉斂衿采逸珂帽神清籤書成城抽豪列岫龍團茶
冷漱玉無聲誰尾香沈裊霞如縷埽花圍裙襪舜華之佩
丸墨盈斗譜石黛之歌芙蓉腕底淺拂雲箋翡翠簾前代
融奩管不日不月云誰之思是邪非邪顧我則笑幻哉斯
境麗矣其仙夫解纜結言悲懷故宇含波通素寄心君王
本以緣情隱關綺語織縑初罷誰察雙蛾學繡未成難工
巧笑景形羞並榛苓有思蹇脩不來菘菘盈室同心離疏
莫憐瓊瑋閨中窈窕空獻明璫碧蟾炯炯忽悟前身丹蛻
遠遠或能先覺是知同遊洛浦歎瑤佩之終虛久謁臨卭

感鳴琴之難遇既遺世其若塵定傾城而獨立此卽圖之所由作也余惟裴回日算窈窕年華攬明鏡於中懷恨激臺之易隔迴腸九折敢寫相思有美一人忍與終古掩卷默契悅若有以誰能西歸牽裳恐阻攜珠盤於逝水悲凝翼於中途請質斯言爲君增意

懷知圖敘

夫引鏡寓形媿妍易察程才待遇顯晦難期何則戚乎中者脩約不炫於自見聽乎物者卑抗不可以概求神醴始導同於混混之泉嘉穗合生翳於蔚蔚之卉卓攄之駿非孫陽則不顧幽壑之桐舍雍門而誰拂士之生也建形不異於覆植躬不殊乎類茂德雅度濫以淵深夙智奇能閭於造次開戶懷感行年自傷或憔悴以終貧歎睨阡而無耦乃有藻識之賢合志之士桑落有願擁篲爭前榆蔭不

移解瑒相荅吐一言則玩詠不忘奏一裁則咨嗟終旦扶
風長者刷其羽毛淮陽君公賜以欬唾北海造席接賞譙
於當時西安不來謂煩憂之難遣至於橐蘭香淮漸久能
親露木風榮臨年共說千里命駕而撫臆論心四方合軫
而望塵請友析義於經籍之廣砥行於道德之華不必竝
位齊齒列開同游而陶陶永夕銜尊酒之歡悒悒畢生懷
國士之遇是故古之君子明死生之分挈去就之義而盼
睠之節殉以不貲之身氣類之通敵於生我之愛人之相
知固如是乎伯生先生學闡九奧德鍾三懿守青箱之祕
經起黃中之高譽騁詞以會交讚賢以輔志蓋嘗載笈周
秦之域曠覽并冀之區在位通流處散名雋得意者奉手
投分者斂衽展君卿之脣舌當子春之旗鼓潁川荀淑有
師表之稱汝南袁公致分坐之禮樓東初日或重清裁圍

扇桃根亦吟佳什速乎發軌清途影組東國政道風流化
行艸偃廉節上達表乎百城循治所數潤乎九里若夫晨
鐙夜燭時賦懷人朗月清風翹瞻遠道恤楊恭之屏嗣憶
張堪之片言十年封篋猶有遺文三步迴車爲營薄醪明
明如月河梁執手之時靄靄停雲京洛緇塵之會未嘗不
顧景而增思停觴而太息也暇乃綜其梗概誌其勝游或
寫形於杵臼之間或寄懷於巖壑之內爲懷知圖八幀以
記之嗟乎寒蟬清露一葉之所容身鴻毛順風飛蓬之所
託迹絲絲葛藟之野達人過之而沾衿萋萋芳艸之章志
士聞之而隕涕千載而下寧復相知九泉可與吾將誰託
是獨卞和於邑冀良璞之終明朱穆貞孤見斷金之不易
繫何人哉繫何人哉觀斯圖者亦可知詘申之所感矣篋
也顛訥之質願湛身而無由瓠落之行雖淪時而不惜先

生假之以光華篤之以菽業仲宣始謁輒付臧書次道相逢頗傾家釀遂使軼碣石而自驚振耗麩而欲舞丹鉛可抱先陳執義之門白雲雖遙終有酬知之地其將有光於斯圖歟抑終愧之也先生命爲之敘故敢綴言其情焉

陸祁生宣南話舊圖敘

僕於哲人正交之道嘗識之矣儒行曰合志同方營道同術孔子曰卒遇故人曾無舊言則吾鄙之是知鳥煦魚沫匿就其儕白羽素絲投於所習艸蟲旣躍聲氣相求風馬雖殊標榜緣達故有披袵暫面望塵寄懷示以丹心說其華藻神魂繫乎千里愉戚同於畢生益簪削秀翰敷妍惜近則寒叢零葉尙論古人未知所裁惟我友生實符斯願於是陸君祁生言念古歎悵然遐日感曜靈之急馭知陳迹之易迷迺伸豪約楮設境寓情屬盛君大士代作宣南

話舊圖而命同人系之詩以記焉時則霜颺乍警清陰滿
空砌藥朝飛庭果宵墜都館蒙密層牘閒做虞翻別榻奇
書盡陳管窺藜牀坐客恆滿哈笑旣作狂歌相荅各謀尊
酒爭浮瓜李六博彈棊閒以絲竹主賓相忘樂不可竟至
於晨鏡未關宵月當午輒復畱連促膝述往傷懷思南皮
之勝游悲山陽之逝侶涼露有聲鳴烏夜起不知攜手何
以泫然嗟乎一土之生別於傭保百年之內促於脩名欲
與結綬天閣高議雲臺奏禮千卷立功萬里招拔類之友
不世出之才進揖皋龍退哂枚馬斯其上也否則列館西
河講學東海纂組絕業自名一家弦誦六藝郭郭百氏守
先聖之遺緒求至道之大經抑其次也下之亦欲罄景窮
谷韜光重淵製芟相酬采藥以贈具茅容之雞黍呼龐公
之妻子同爲農夫長謝世網致足樂矣而獨俯仰失時牽

率喪志鉛刀不臧燕石空銜束縵加肘逼壤側足戚戚嗟
嗟至於沒齒秋風一來奔走四海骨肉之愛去若斷絲心
脊之契傷如脫篲死生契闊之怨羈旅淪薄之思靡日不
臻何人能免雖使怡衍良辰消搖讌飲晨夢易寤瞬息已
非豈足消犬噫之氣飲屬車之愁乎入斯圖者凡二十有
八人皆以特立獨行厚儷勤類擅文章之譽得狂狷之名
而所企不過一尺之階所患不過一簞之食仰息者高於
虹霓紆體者卑於渤澥登降殊軌益亢難鳴慷慨而起可
勝道哉人之志慮悔不早立僕也愧南州之高士從洛陽
之少年殉名未甘遁俗已晚行當葺宇幽岫爲人外之游
百昔琅邪王秀之慕宗測之高風輒繪其形與已相對他
日懷舊之作君倘有意於此乎若夫歌十畝之詩寫白檀
之扇並耕終年臥游狹室如嗣宗之遇蘇門長康之畫幼

輿使知之者著於泉石之中求之者晤於行障之上則斯
圖不廢宜爲先聲恐亦非僕之所敢期也聊以記之云爾
贈陳丹崖敘

陳君丹崖吳之晉陵人也璇壁折源旭日媚谷識鏡泰初
智孕萬宇載籍羣羅富若編貝詞華專綵麗於春雲丹瓊
遜寶綠蘭謝芬高韻夕騫神明朝起生平箸述好事壯遊
東涉河洛先登岱峰北溯京燕至於恆嶽探芝鳳巢叩梧
龍圖上鑿石斧潛啟玉簡導稷耶之士招太室之精於是
天關崔嵬峻坂鬱律怪木拱削陰飄斜趣翠雲橫磴逢躡
皆飛行雨如蓋迴瞬卽霽乃駕熊經輿層霄前巨靈後昌
容呼吸六氣餐羞五采鍊其形精助爾瞻目蒞異闕奇神
僊是資震偏泰壺不可久居歸來南國湘水千里春陽叟
綿煤粉畱眼絲絲波漲瑟瑟天低香芷數尋遊絮一尺蘭

雨酣酒燕風暖人藉譙西陂相樂終日旣而潘岳閒居嵇
生倦返緬倦昔時曾當跋履山川陵胸歲月積指寐求華
胥晨則虛境述爲文章宿已陳迹不若翰其寶跗舒乎丹
青采逐煙遙豪隨錦落遊鸞驚霧衛鱗揚淵潑墨而障空
欲升投袂而銀河俱動表珍銅阿霜生夏簟紀節溫國暑
滿秋紈長安三月弄玉吹簫夕陽一丈落花結佩景不假
臻神所妙領固已僧繚退舍探微慙拙雖幽思之偶紆尤
畸士之末技也然而蒿牀溼鋪荷裳不易朋從欲稀坎壈
久處仲蔚之介猶有蓬屋子山之賦獨無小園師榮叟之
帶索嗤揚雄之逐貧夫廣寸之珠郢人按視千金之帚燕
客自享日攝管竇徑可規天身披隼翼出而駭眾河魴無
斗水之需餓麟無落毛之日斯世爭尙契可合言伊人有
懷窮固其所耳履簞齒弱惟倍神交載傾入次公之座知

能養空望長康之廚盡成靈變感言慷慨敘而貽之云爾
送趙林一敘

嘉慶壬申八月趙子林一將北遊時則秋陰滿衣午涼在
樹蓼花艇小杖履可容稻兩波平舟櫓悉啟十日惟吉傲
具以行其友方履箴載尊酒而送之曰昔人北林之造位
或損臆志士南浦之歌錄已盈筭誠以弦箏之曠眷戀深
於白雲參辰之感積憂明於丹鶴滄海遠道十年有思馨
香闕懷千里誰贈臨河太息達者未免矧吾與子能不加
歛吾自弱歲辭傅卯角謀交西謁隴荒惟觀塵迹北走燕
趙至於上都時君昆季羈客於此請擊未暇已篤心誼執
袂道故乃識舊姻徐摛形弱依周捨爲外兄范縝矜才比
蕭生於愛弟牛車道上擁背忘寒客帳宵中論經靡倦傾
蓋之始縞幣尙焉旣而白紵拋殘黑貂告敝勞載短短將

侍宦於秦川驚沙濛濛棄知心於日下於是斷魂隨轍轉
疾於奔雷悲吟接天聲溢乎河曲束箋一寸不消季重之
愁嘉言三復盡入洪喬之屐如此寒暑若彌年載而汎梗
所經復逢故館求志希獲無異曩時遂乃倦遊辭返竝轡
歸來入林宗之里朋儔遊其連裾登伯符之堂華顛喜其
得友居鮮一日之隔門徹半介之通跬步籠迹曜景振華
齋居盤盤言笑宴宴葢同息大江以南者不自知其歲月
之更也然而緝弧之用資良治以成膠筍玉之生望他山
而援手與典可尋諮孝緒於鍾阜令言聞往就少傅於東
甌葢嘗風雨破夜危論若師幅巾終朝逸思成陳志荒所
業則振袵以悟之擇交失端則微辭以導之素絲白羽染
采因柯露木風榮臨年共說此神契之道無愧也哉今子
將蜚英聲筵上侍捐金展研玉岫而余奄滯故廬不克企

軌今日之別我勞如何吾子行矣踴步不休跋整千里累
塵不輟岱岳崇成以勛明德爲吾子箴鉛刀雖貴鈍於莫
邪五味雖甘不先稻黍榮利之誘毋以徇取久穀干驚亞
於一駿籠樊之鶴六翻終奮賞音在人益已惟敬審友之
道爲吾子進吾子行矣舉策而告者謀夫之英贈言而退
者睿哲之範爰敢綴述往契期誌後腴凡百攸思神與子
偕

春其遊陶園敘

晉陵多陂池竹木之勝而西南之濱尤饒逸致碧流三尺
紅芷百尋郭檣接天檐牙隱樹早畦未翦菜香襲衣遠隴
相環麥秀成浪時值春寒芳桃滿枝忽聞鳥聲落葉盈陌
十里五里飛花有臺朝陽夕陽遊絲互路脩葉擲比中通
廣橋循橋而行迺得名蹟是日陶園蓋唐先生荆川讀書

之館也後歸陶氏遂以陶名韋臯之宅人識其故居鄭公之鄉名成於舊德虬壁當戶椒墀爲徑廣不百步邃止十丈重籬拂雲皆成喬木曲沼引岫通於迴溪藤陰蟠空全蔽日月蒼篠鳴籟襟以風雨崇垤如掌分泰岱之一隅峻石若拳鬱蛟龍之萬變是則竟日而往莫測其幽極目而觀未究其勝者矣余惟息居多暇遊衿思曠良朋相攜好風與俱騁足於芳浦稅駕乎茲園顧盼亭皋之外偃泊虹霞之中疏箔列袒晚蘭障袂高論布響泉嘶於山狂歌仁興室忘其主蓋自若木之旭迨乎玉繩之低渚禽求宿宛巖羣呼潛鱗戢遊晦映爭采於是析軫舊轍停策還途惟舒嘯之旣窮亦棲薄之所悵也夫中山之賞皆擅名流南澗之情猶多慷慨琴尊落落遐心何從居諸攘攘奇懷盡破況以勞人之生尤增他鄉之恨十日促膝寡平原之歡

千里命駕無當時之驛朗月不來孤煙長抱斗酒今日挑
李雷陰望在南山之南北山之北飛步天未言念君子百
年雖短悲胡能已若茲園者亦農夫五畝之宮也徒以積
阜作勢因水爲奇遂使林壑增其異色汀洲藉其餘韻憑
眺者有古今之感流連者有悲樂之殊彼所遠託豈汎汎
哉吾人之覽於此者能無悟思乎因各賦詩而繫之敘時
則嘉慶十八年癸酉之三月也同遊者爲吳江吳育武進
李慶來陽湖周儀暉儀萬儀顯管適羣大興方履錢凡七
人詩若干首

與董方立論古泉書

方立足下來書云長安市中古泉銅質爛惡率多贗物恐
足下於此尙未及深究也請陳其略幸覽采焉蓋自斟元
陳樞先定司契迭辟繼道卽稱佯贊逮乎歷山之起範金

而爲幣涓叟之遺規圖而成象安陽平陽歲秦垂乎小布
五千五百新莽繼以貨刀孝建之後始知紀年開元以前
尚無通寶彼泉之源伊其遠矣於是探奇之士證古之餘
商周有文憑於彝鼎金石雖廣吝於儒生輸此癖意繫惟
孔方好之既篤爰有四益夫史之爲帙富於滌岳代之改
元繇於日星披誦未周茫乎莫憶偶徵異品必事攷詢則
僭竊之稱庶不惰於正統絕域之號可無登於中原辨名
既正讀史所資其益一也襄垣之幣字皆從埒安邑之金
文都作足贊允則太古難名號緇則梵言莫解形聲同錯
卽可溯夫五代假借成義是可通於六書其益二也文錢
四出已識塵守之譏太貨六銖迺兆義腰之哭居攝瀆制
而民不克從景和鑄輕而商行轉阻覲貨用之興廢知代
嬗之盛衰其益三也吾人讀書鄙兼謀食不言阿堵久嗟

其愚匿志飛蚊又懲其陋我則貫於杖頭先徵肉好置之
空橐無愧圖書和嶠之癖聊以解嘲劉寵之選差堪自說
其益四也因此四端更有五失則或推論未廣泥古過深
執太昊之棘而求干楯之形信路史之文而得葛垵之器
九府未啟已有圓模五幣未通預加吉鏤是則強結繩之
朝爲分班楮代茹毛之聖貽以釜鬻此一失也又或目受
所域臆評自雄永壽係於外蕃而誤傳西漢太安鑄自大
理而訛爲後涼布泉不辨佩玉筋而曰宜男鍾官未詳鏡
赤仄以符式女是則楚人之謀契行舟而求劍莊生之喻
斷鶴脛以續鳧此二失也自漢迄隋屢製五銖有唐終始
不廢開通質有重輕字分隸楷細核其代始可詳知今乃
釋齊國吉貨之疑遂呼杏九仍大黃布刀之謬息其橫干
是則雌霓未校莫正其証蹲鴟相傳奉爲圭臬此三失也

平準之治依在帝都偏安之泉未布四海是以建安直百
存於蜀邛赤烏當干徑於江左使其不按輿畿范羅品類
則猶渡淮食楮失之於枳綠木求魚失之於海此四失也
且東郭吹竽世多濫列毛生脫穎務在知人登九都之市
而索于古之金則必上問軒轅之貝次徵有虞之策不知
則寶徹帚而自享知則擲燕石於壺盧而罕如豐貨珍如
九幣者方且字蝕綠而隨朽株輪飛赤而充下陳推之足
下所云或有蔽於此乎此五失也僕少客隴右長遊燕京
車迹所抵按訪靡懈今居江東遂無同嗜履不越閩睫不
過帶此志雖博遠使怠荒惟念足下旅於長安秦漢及唐
建都彼國異品所湮或失交臂甚可慨也願足下祛其五
失就此四益摭實據華遠望爲幸如有所得速以報我

荅陳伯游書

孤子方履箠頓首伯游先生足下夫求履憲者貴乎因述
聆曲度者冀其同謦而今時級學之流抱蕝蓬室之下獨
噓寡和顧景鮮儔詠北風以增悽思南金而抗首豈不以
地密者情殊誼親者軫阻營道有同異趨術有後先哉孤
子蹇資易竭鄙槩難宏幸生文義之鄉得企英賢之軌入
門見賞曾荷宗慈對案忘餐非無尹敏加以孟陽侍宦逾
劍閣之千尋子長好游浮沅湘之九曲凡玉振江表龍躍
雲津縞帶可貽清稔是託過蒲亭而師季智之陳國則親
仲弓屢聞啟誨之言恆抱合離之感昔在皖濱側聞足下
貞亮爲行清麗善思吞文石而攬奇夢繡囊而溢采王充
之論德盛文明班固之徒名香文美惟懷虛眷未展慊忱
嗣得邴生來問言足下愛玩疵篇願爲良介及與哲弟言
晤又知足下盱衡小善時發寤思爲北海之所知能無驚

喜得休文而歎詠已屬改觀方欲投刺寫心執弦代摯而
孤子蠶結三塗災窮六極蜴虺含毒難求宏覆之人艸木
有心終無可植之士魂爽崩裂生慮俱空文實交頽強顏
何自是以閉臧愒息隳廢神交終歲蹉跎寸疏遲闊詎意
足下勤恤舊誼惠賁新詞博喻篇章比子桓之典論獎飾
譚陋洵元規之過言至其天機茂闡神韻遐超采不掩情
質能立範積玉玄圃無非夜光伐材鄧林皆成奇木自足
軼永明之躅嗣正始之音若孤子者墜岸顛愚面牆矇惑
偶懷鉛槧徒說峴聲孔璋武庫之雄已消神氣子雲雕蟲
之悔但賦牢愁豈能揚挖流風周咨大雅然竊窺文奧追
溯前塵每謂奇偶相生大圓所以啟運玄黃成采睿哲所
以含章故繼經有作必開屈宋之宗逮漢以還遂建曹劉
之轍此實體變之繇抑乃化機之理雖云六代同尚華腴

究其百年屢經翦汰立風久扇始革乎仲文麗格方遒獨
擢於子野所謂若無新變不能代雄推此一言律夫千古
苟有作者罔不同情夫意以文宣文以氣植精采煥越非
佹嬴之是求神思淵通豈枯槁之能化運臧舟於大力百
儷何傷滯棘軸於方穿單辭爲梗是知濡豪雖眾如艸靡
秋染翰長存披沙見寶然則沈詩任筆豈皆玉山之類北
庾南徐孰非金鼓之振退之之作誠可起衰隋紀以前猶
當其盛足下片言乍剖已探象罔之懷四科若分必入相
如之室孤子叩鐘響寂能勿植顏躡屨途長尤勤遠慕佐
公之賦託明鏡於末光孝穆之書希雙環之俱見春榮馳
檄秋水載賡定厚契於斯文貢深心於此日君魚可仰從
受道而無辭宗溯難逢願畫形而相對自悲窮結負辱年
光惟軫芳猷懋宣時譽因之感系書不盡懷

江行記

歲入玄默月居陽首方子將由金陵至於漢陽乃溯岷江
別沱水擘洪波指太清瀾溟習句呀呬溼潏潏潏潏潏
澗沆濊初映躍輪砥如重簞乍激迴駟轟見層巒瞬睫少
舉可撫萬里雲天相逮曾不一尺於是霽光在枕晨颺上
衣舟人羣呼容子驚視赤潦拍蕩垂腕能接黃霞彌漫障
裏欲飛蒲颿揚鱗吼音終旦筒篙森刺浪勇欲奪走電謝
遲勁矢忘速孤鶴無景哀媛有聲邊笳四起沈霧干仞地
軸爭峙至此而遙則東望棲霞之岫西眺彭澤之陂指鸚
武之洲揖雒尾之渚莫不俯臨前席追攬後塵散魂陵魄
浮采鷲思洵穹寰之奇觀平生之盛遊也徐理衿幘低憑
軒窗一編將展奔魚駐而竊觀狂吟遠伸鳴鼉爲之起舞
偶有所作濡翰未竭洪波洄渙鼓於几下削稟投之駭退

十丈往昔嘯歌好言激壯讀景純之賦吸怒濤於吻沫攷
道元之經推逆流於握指以今況之誠異曩域若其浩蛟
所盤陽侯所牧通漉之所遄溯遐溟之所泚潤鳥不及盼
魚不暇亢圍彼瓊巖易於莖敦涿洞八荒若灌若疏蓋千
萬載而無繫帶爲之輔者百川豈能個哉旣而寒潮緩升
岸艸盡失葦枝迎拜惟餘素塵水氣上驚半作絳采金輦
哀趣左右若木華琚低映中環太空又復激瀾作食借石
謀居菰米欲炊奇芬墜於蒼冥濁醪橫前餘歡達於鄰渚
宿雁戢翼招其逸侶江豚掉尾時甘噉人挽首遙望汀洲
無際顧我鄉國隱於天末容足之外卽馮夷之宮瞪目而
觀非蓬瀛之客日落未落招美人之葭花道阻且長傷交
甫之棄佩思緒闐寂悠悠何如嗟乎人生之質非金石所
流百年之期非風雨所破而欲閉室間之雀息輓天上之

榆星不亦惑乎今雖單袂孕兩雙屐分虹碣岸突下噤不敢吐逆濤積湧恬不敢吞奇懷夙砥非達士之憂慄也述其所覩因以志之云爾

陸母林太孺人家傳

母姓林氏諱桂福建閩縣人蚤喪父母依族姑以居十德之門判乎單祚九真之望獨偃衰宗微華夙茂端操有則程纂組之麗閑德象之規年十五嬪於陸氏爲恭城君諱廣霖之筮室時女君謝祿室有虛位寢闈之政總筭而脩恭城君數宰遐陬著廉平之治三去其官再黜而起心勞公職家復多故凡先廟魚菽之祀威姑醴醢之養婉變襍佩之章綱繆遠道之問事無洪纖咸咨惠姑是能肅禮不忒承志毋違虔箴盟而忘勤徹禴狄而畏僭至恭城君歸老於鄉則有親雅之宴游少陵之疏附未嘗不潔脯以進

斗酒爲歡及其也也指膺入幃輟泣告殯謀附身之事正
朝章之服勿使有愆以虧先德雖李媛之供客具柳姜之
正衾哀愧乎今昔蔑以逾矣恭城君有子五人母所生者
二日繼裴才而早天日繼輅生六歲而孤母嘗曰吾丁不
辰髻鬣失育未能沐慈父之訓聞母師之教年始成立執
箕帚於陸氏侍先公者二十餘年矣見其奉上長民明哲
而惠敬親睦宗恪誠以和瞑目之會家無僭后繼輅之生
值父莫年庭誥罕聞遺命有託才也則爲慶之餘不才則
爲殃之泰悠悠之口豈復有所底哉恆恐繼輅墮節敗行
負玷逝者吾所以曉夜憂思求督誘之方且驚子可以常
勒羈軼才難以庸範御故縱使博覽典籍延接英彥冀獲
勝己之益以繼尙友之功若夫懿文德揚先聲進而不怠
斯亦未也人忍死之效也記曰寡婦之子非有見焉勿與

爲友嗟乎孤者失天又窮於人苟非自勵將爲唾餘寧不傷邪聞其言者莫不爲之揮涕仰其卓識焉於是繼輅焯掌劬業虛懷納善學深奧隨文爲詞宗初選茂才復舉孝廉繼裴之子耀適亦少有盛名時論偕重同里張惠言莊曾儀惲敬洪節孫等十許人並當世名賢負人倫之鑒皆與撫塵定契展席拜親然後知通雋之器本於式穀義方之美挹平古人其子之才成於其母之賢高朗典法爲近禩所希觀矣若其疼念戶內周支饗飧自脫瑱環饋給媵郁蓋自恭城君之亾訖乎母身之存賸興晚處體任手操春桑浴絲秋菹薦簋未嘗一日而不兢兢一事而非黽勉心圖其大慮該乎微碩宗不墜繫於斯人而已母以嘉慶十五年卒年七十有五著家誡若干言子繼輅述年譜一卷四方能文之士爲作銘誌哀誄集爲二卷藏於家論曰

昔范曄勉求令名而孟博齊聲李杜劉母不受虛譽而眞
長比德荀彧見其成仁則身就阼而不悔灼其宏才則詣
日進而未允懷義知人本於毛裏恠恠相誠以底於道若
下此榮利之事寧有冀焉慨乎民質不淳俗尚日靡奢佚
之羨根於性人爵之倖成於教子之初立父提師誨皆謀
弋獲同於穿箭不復知有奇偉之節仁義之軌見有矯潔
好古之士反譁然嗤之引以爲戒冠冕者皆然遑論夫閨
闕哉如陸母之垂誠不以祿位爲貴深居重帟而知天下
之士置子於賢人之林勛子以不朽之業美言尊行踵於
耳目卒使其子若孫爲世通德豪俊長者屈膝起居敬慕
不已視若己親何其曠識明知若斯之夔越乎雖媿之范
劉曷有愧焉論箸爲經義足以風欲求高世之行不泯乎
遠閭淺之習聞而稍悟故擬中壘列女之篇爲之傳而申

論之以備史氏之采擇贊曰

恪次心囑殫思蓬麻樹息良藪鬱德維華標尚曠世端禮
柔家敢陳女史德音嗣遐

董方立誄并敘

維道光三年七月董君方立卒於京師嗚呼哀哉疾甚落
眉難拯仲宣之厄夢驚書髮竟兆元伯之凶冉冉鉗丙無
及於東隅濛濛上圓不徹於南斗嗚呼哀哉君諱祐誠字
方立一字蘭石江蘇陽湖人也胄燁騰編代著通籍風標
秀舉耀於初儀志氣貞立揚於術序珍寂以躋其道守素
以鞏其操侍宦汙雍所歷遐僻既乏師資亦鮮勝侶戴宏
丞舍莫聞其誦聲羊欣練褰未遑夫佳翰二難相誨七業
俱興恭丕則閉門講藝機雲則分麻摘華益已騁驥長途
而一日千里矣年十有九始借兄基誠歸試郡邑墨冠其

曹遂領鬢俊由是聲譽聿隆輝映江左東南之寶復見褚
生平輿之龍爭推許劭室靡藜菽養資莖節爰斂修豪出
綰遊履名卿改席於清塵茂宰傾綏於盛美雖洛陽年少
吳公之薦未伸而安定書生皇甫之迎恐後俄而哲昆騫
舉典職農曹君乃返白關中來依日下擬班超之入洛同
謝淪之游荆鑽研益峻覽照無遺辨白題之名釋紫荷之
橐時宗之所推挹有識之所深歎二十八舉京兆試趙典
對策爲諸儒之表劉歙充秀有得人之稱方謂吐聲中朝
濯秀陽谷而迺三應禮科兩就襍試與渫未升容刀屢脫
年始踰於顏子齒僅逮乎賈生癘疫是膺虞淵遽迫嗚呼
哀哉傷金鑑之乍掩悼玉樹之長埋杜楬風韻竟損其遐
齡桓彬行業終湮於斯世以是論悲潛焉何極君器宇沖
勁神鋒標映九臯絕迹百行斯融庭幃盡其蒸蒸圭璧貞

其筆毫言無玷而愈見其默氣自抑而眾莫不驚其爲學也采珍於羣流窺微於至奧涉目則誦借手以書爰在始冠勤於屬辭傲藹驚芬造次卽發調鐘韻瑄鏗鏘便奏擅碧雞之俊妙兼雌霓之新奇不自綜括多就散佚今所存者止駢體文一卷詞一卷雅好周髀尤明厯象八會五羅之篇九宮一算之術究今昔之隱通中西之法守根據窮披浮索蘊潛思以致叡鉤墮以達明間祕籍而輒求廢人事而推測足以補季長未合之理詮子雲摹據之文迺界句繩之曲直陳索黍之多寡取徑度於中星勒哀弦於黃道所著有割圓連比例術圖解三卷橢圓求周術一卷裏弧三邊求角補術一卷堆垛求積術一卷三統術衍補一卷又嘗考輿地之記箋桑腳之詳爲水經注疏證成三卷而病作不竟其業又撰長安縣志三十卷則代人之作也

嗚呼君以開敏貞固之姿濟其幾密瑰偉之學使造物有心假之中壽則膏腴流於康時華曜明於竹帛彌綸古訓經緯先民其所造詣疇克媲之而竟萎榦於未霜之辰踈足於中冀之野麈尾轉而自傷麟角成而何裨豈不惜哉豈不惜哉德公上書期於何日延之作誄輒復經年蓋悼痛之深非可託之豪素英華旣墜安能招以旒旗也隙陰易逝悲緒稍申懼其音微之就沫玄慮之莫察懷不能已是用敘哀其辭曰

芳蘼維蔚植於幽陔馥烈弗章緜霜是摧我有俊民道藝胥該蓄彼絢素薦以瓊瑰倚斲方立舉儔儷古黃中涵照兀風絜矩亭亭物表軒軒霞舉孝敬涓深則篤其祐積志委正如陽赴蔭隼鬪百盤丹霄誰禁錦組初構雲漢爲經洞包典籍究心緯讖闡茲麗則玉質金相碑傳桐柏賦嗣

靈光登軌絕蹈內學斯章錙銖甘石稭稭即襄志學求友
吾實知子晝揭宵盤三墳百氏屬文心競執鞭爭駛牽課
跛牂追隨駉駉以疑相校以名相砥無摘不取有揚必美
絕塵斯達醇脩日起吾見其進未見其止學優而仕謂有
常經印須我友出應弓旌一辭蘿薜終縛塵纓豈期巨壑
竟阻長鯨困敦之紀射策初罷蕭寥京館淒清永夜維子
與汝景形相藉投奇訪碣耽吟成社子實慨慷推枕起語
念茲榮陞曷欣曷沮庶幾述作兼資雅詣致思天人道在
吾侶子雖疏陋允聆斯言陶陶卒歲單衾忘寒亦越三載
始振羽翰齊名秋賦相得彌歡子之妙譽當塗爭賞子之
逸藻士流無兩霜銑一鳴不聞嗣響卓犖久闕營魂遂往
嗚呼哀哉上才育世泯焉未施瑣瑣人爵天既吝之又蹙
其生俛隕厥奇忍矣園極不我憇遺靈憲一卷洞扉十篇

寸管所憐豪未罔愆張蒼廕仕卓茂承年日能斯駕日遇
則縣嗚呼哀哉別子燕市悠悠四稔豈不爾思積懷誰諭
亦有晨風相貽尺錦研質古義諮詢詳審來析既承往告
復達子已彌留猶勤攬察我方延首怨此契闊忽奉悼書
肌膺如割嗚呼哀哉疇昔共期身歿名存子齒雖少精詣
已陳祿固未逮垂兼令閭懷和長畢堪慰潛魂嗟子荒廢
譬彼瘞木拈羽云亾蒙心安勵廿載初衷杳杳誰屬英爽
有知亦將悲哭文行終始悉吾所瞻欲表其德短筆是慙
隱痛彌深遺輝恐淹爲子竭思吾復何嫌淚調玄鑿色黯
緜緜歌同薤露泣告西嶺

鄧完白先生墓表

先生字石如號完白安徽懷遠人也初名某後避

仁宗皇帝御名故遂以字行先生秉九鴻之清則鍾于禩

之逸靈德邃含樸思敏通微玄猷洞深翽詣峻拔非蓬麻
之生無鐵雕之助少罹孤悻未專誦習采摛入市編荆爲
牀願歡之家世既寒高允之儋笈不忘偶耽摹印精別蟲
書蟠扁奇麗雲霞迴互遂乃攷遺範於八體稽變象於六
文思垂露之棲英覽挾石之恢異以爲蝌籀俱失小篆乃
尊絲美旣衰佐隸是尙盡取當世所存古刻上自鼎卣文
識下至陳倉石鼓兩漢瓦額六代諸碑挹其神倪研厥精
魄貫幽達顯得意忘形蓋嘗濡墨盈斗束管如筆申且不
寐中屢忘餐行屨逆旅手畫凝塵抱膝實廬指穿側衽懸
帳以索其深倚榻以窺其奧收綜攝之要明向背之宜辨
星緯之運行察川畛之交錯周人紀之和選綴蟠化之動
息烟縵泱鬱幼眇連卷有觸斯應無境不轄而又有邁往
不屑之韻貞確難拔之情進不徇俗以貿名退不飾奇以

驚眾壹志於是四十餘年然後其學粹然大成竊攷先生之書實始於篆由篆出隸由隸出眞由眞出行故其意則同條共貫其美則自葉流根情質宜融修短起伏力不外傳險必内含肅乎若瑚璉之陳鏗乎若韶夏之和奮乎若矛鏃之利藹乎若麟鳳之儀控之不可前挽之不可後因方而成規卽圓而應矩累千百之文而氣無不洽分鏗穎之細而神無不全至矣哉洵盂孟之祕蘊翰牘之聖功其發於自然擴於無際者固不可得而言也蓋自涪醜相判損益日滋史書亂於西京俗體逞於東晉孟皇伯玉已易前模幼安元常各標新致典午之後篆隸俱摧雖如少溫之古欽倚物惟則之雁足印沙客氣猶存古韻漸失自宋以來杳無嗣響學者不乏操筆卽非觚離踳駁四軌龙蒙媿矧似優鈍滯如桶天乃愍絕學之永墜惜先聖之茂典

蓄奇渟澤久之又久而後發之於斯賢也嗚呼素書八角
得嵩山石室之傳黃庭一經感天台丈人之問而鴻都無
闕咽之車雲臺缺縣組之榜湘東之館輕善勛之干言上
谷之峰落次仲之二翻雖有博達君子楊花休嘉疑爲古
人詡其命世其如菅昧已久好尚實殊見真龍而輒驚守
璞鼠而不悔但師趙壹之非豈識陳遵之妙迨先生既已
十餘年而其道漸昌至於寸楮片文珍於和璧遺簡零墨
罕如景星覲於蠶紙之中求之槩几之上而曩之所貽者
固百不一二存焉將與瓊邪之碣陳留之作等其瓌寶矣
使後之願學者慕而不覩聞而未從豈不惜哉豈不惜哉
先生卒於嘉慶十年年六十有七有子曰尙壘能世其學
余與先生雖年世相接而齒晚道遐未嘗奉光塵侍屏席
竊有服膺之志私艾之誠削版則往紀難追觀碑則十旬

空返乃與四方同志級述絕藪昭表至行列之阡右以闡
光烈其銘曰

飛龍創製天廩叫驚百代迭變弱媚充盈蒼昊育德哲士
挺生寶文異藻瑞我 聖清於休純懿靡師靡友習與古
會獨啟閔編千五百載荒途豁剖點豪染素光燭台斗如
珠集球如穀成醕抽絲散水顧盼自如一波一偃或疾或
徐左揖右讓佩玉瓊琚悵悒悒父慈子孝款款雍雍君
仁臣道黻珽綬紳典謨訓誥萬象以明百采是耀春卉秋
雲麗絕所思枯藤幽澗鳴鳥不知壯士揮戈天日慘悽愁
人怨婦密霰輕霧本末相順終始相應離之則傷拘之則
病唐弓九合不柔不勁欹器半虛惟中惟正采鳳在原莫
攬其輝片羽僅存眾目騁騁奇迹千古燦逾朝暉吁嗟先
生宿艸已萎韋君之墓豈臧筆勢玉潤金相究在當世孰

能有心勿翦勿棄後生趨效典則已備二三士友愴懷官
冥潺浚江水繳固幽局瑤臺碧月丹檢玄庭曠念昔徵眎
此景銘

文林郎湖北東湖縣知縣洪君墓碣

日清有直臣編脩洪北江先生勤攬上操根道核裁端諒
正辭播烈中甸載育元嗣蹈騰餘輟綜述文猷悖宜雅行
於時承學景附之士僉謂蓮勺經訓仲師兼通司隸風義
文泉益振則惟我友東湖君實膺其譽焉君諱節孫字孟
慈一字祐甫先世爲宏氏避唐孝敬皇帝諱易姓曰洪諫
議大夫經綸奠居於歛遂爲茂族三十六傳復遷陽湖至
北江先生以僑籍通顯故君遂爲陽湖人也稟玉燭之眞
采體蘭石之自然鬣鬣廣誦闕憤砥躬媿志重親有子珪
之篤雁業都講有君魚之敏名理探乎九師交擊迪於八

顧矜氣翹節蓄縮是帽坐中抱璞櫟樾弗尙旣乃揚英西
豪侍游東觀佐人倫之鑒預立言之奧斥中壘經術之殊
無子順異同之論俊髦納履君挹其奇典冊盈案君釋其
緒於是鴻辭鏤於藻林脩名徹於京國大小章句學者所
宗精良綜事家督克任爰值先公卓建謹議入繫請室出
成伊吾精誠動天 召歸田里君徒跌求援崎嶇奉母殫
心顛沛之辰以盡溫恭之職家難獲紓頤親誨弟初舉孝
廉屢應貢計遭喪骨立勺漿廢旬諫紀服除而消瘠崔實
竭貲而營隴世篤至行閭鄙慕焉給札史館攷績奏名選
授湖北東湖縣知縣班條申信削記厲威宣六陽之仁軫
九金之肅邑有豪猾蠹虐積稔君刊厥飲章報以重比伍
士弗齟攘我市旅君執仆於階以倣其長彊衙旣卸清脩
載綏開校舍甄秀艾期月未臻功化以就伐枳棘而見頌

毓嘉禾以薦瑞謂受介祐將爲國表陽鳥巢門景命告謝
以嘉慶二十一年七月卒於官舍釋耒下機奔走厥角束
君之澤空歌長生郊令之亾悲纏服義德優齒新愴兮何
極君深明訓故尤邃史學嘗謂扶風以降志表多缺汎覽
廣輯次第纂補已成之編二十餘卷稟所未竟不啻倍之
詩文遺集又及十卷嗚呼君之享年僅四十有四而逸軌
盛業淵乎莫尙若此之懿豈非桓彬擅過人之姿周乘眞
治國之器哉士友聞悼遐邇失聲喆侶遽摧曷以展抱君
之諸弟追感慈恤仲氏能文敬述楷範因相與刊立玄石
陳於隧左思闡合閭俾耀後昆嗟祿命之不融庶儒修之
永劭銘曰

啟胄惟宏改因時諱諫議卅葉世德罔墜挺生偉賢伉志
匪躬崇廕紹休克孝克恭名父之子經明行脩六藝貫治

四史研蒐祕義丕析軼篇獨舉奕奕華稱脩蘭湛處縮綬
楚邦達於從政禮訓誘蒙峻刑束橫輕塵棲卉奄忽其逝
惠愛莫忘微言執嗣靡不軫懷伊人云遙零露沾裳宿艸
已凋貢詞累善表之瓊闕谷買陵遷英魂爰發
敬業述事之室文

陽湖方駿謨元徵

同治徐州府志敘錄代

道光中世熊從先子宦往來蕭陽宿睢閒經劉項故里及
劉宋朱梁之遺蹟未嘗不歎網緼磅礴之氣孕毓英傑萃
爲名都由是疏紀道里品量人物以爲自古關洛之盛弗
能過也既而佐戎徐州寇難方棘因究山川阨塞之要民
俗風土之變而忻先已承檄從事河防邂逅輒憂歎相與
講求徐土利病蒐攷方志蓋停修闕略百餘載矣當是時

粵逆踞金陵渡江北犯徐當其衝陷豐蹂躪諸下邑候騎
數傳郡城下而究豫匪徒復大起燹火彌望潰兵悍卒縱
暴里閭田疇荒蕪百姓惘恐蕩析剽劫若焚絲之不可理
其間殉義蹈死與夫兵農河瀆治術變革之故殆不勝紀
嗚呼不有述載其何以飭官守昔漢高入秦蕭何獨收圖
籍具知天下形勢張禹使屬朱轆條記風俗班固因之作
地理志嗣後纂述輿地無慮數十家我 朝著之令甲命
守土吏典修方志弗敢荒棄舉夫封域陵谷建置興廢災
祥政事之紀忠諒偉節循吏名賢孝子弟弟貞婦淑女之
行風俗繇賦版籍齋祀之數祠墓遺蹟詩文謠詠之傳闕
梁險阻之所倚川流徙移之所經總摅明辨儷於 國史
述往事詔來禩所以彰勸懲庶敷理政教而納民於軌物
者也然而不得其人則悠謬尤瞽同於胥史之爲而矜雅

瞻者則又偏於述古而不屑勤懃於當世之務或且緣飾
失實最陋不備勸懲不足信文獻無所徵益可慨已徐志
不知所自始明時宏治嘉靖萬厯間皆掇輯之書已散佚
至 國朝順治十年准徐兵備胡廷佐知州余志明重修
越七十年爲康熙六十一年知州姜焯復輯之又越二十
一年爲乾隆七年改州爲府而知府事石杰編纂延虞山
侍御王岐同凡其事又越百二十一年爲 龍飛同治之
十一年世熊奉命監司徐海忻方爲徐郡守皆視事數年
矣兩人故知契會同官捍牧圉昔嘗究心於徐政者也竊
幸羣醜盪殄民咸安其居樂歲粟米豐溢士食舊德而野
人力穡藉以務休養飾閭陋顧念官政解狠吾民率義向
方忠貞卓立之輩接跡及今勿紀陵夷放失後將無可綱
羅矣時今粵東撫張公方督河漕出官緡爲始倡乃謀之

郡屬諸邑令及鄉士大夫僉惟予從於是列史籍稽公牒
訪求故老憚獨之行屬筆於友人劉君庠方君駿謨及方
君令子楷商核名例綜要而經緯之其夏四月志事始舉
再祺而成書用以章顯闡幽拾遺補藝資於故實庶幾奉
遵科教班揚法令兢惕自奮當官而行雖不足化民成俗
語於循良之治抑亦可以無滋臯戾矣夫乃爲之敘曰

王猷允塞六龍弭旒觀政訓俗民大和會廢歌洋洋神哉
遐沛漢帝封禪爰乃知外臣世熊臣祈恭紀 宸翰弟一

宅此徐土朶山浚渠申畫郊圻相協厥居裴制六體賈正
八隅析以疆索是究是圖述輿地圖弟一

列府寺輦城郭隸政司局而妍慝不作述建置圖弟二
觥觥禮堂倫紀攸飭纂組藝文於焉游息榱楹穹隆於論
鼓鐘橫琴束帶弦誦雍容述學校圖弟三

洛下運籌靡聞飄忽研幾失微昏昕乃汨溯紀樞度景端
表揭述曷度表弟一

唐虞建邦肇啟畱呂有革有因綺錯疆圉區壤辨名以隸
百緒述沿革表弟二

吳導涓涓楚塞夷庚角雄逐勝倣擾我眠祥禋占應日射
日貞德音遐暢泰階以平述紀事表弟三

濟濟翔翔朱芾黼裳靖共弭悔倣虐敗常或剛而折或柔
而荒君子蒞止勉爾中行述職官表弟四

贊功分胙錫茲土田維藩維垣名號以宣嬗世墜緒亾也
忽焉述爵封表弟五

矯矯羣彥紆綬端鞞徵庸殊塗宣力則一進矢忠貞退守
恬謚儀爾邦族多士用佶述選舉表弟六

迹已煙名可傳掇遺編景昔賢述人物投古表弟七

奉若天紀敷訓地形惟土物愛程民之經芸芸保居邠圻
徐炯範性飭俗罔俾麗刑蓮輿地攷弟一

嶂以葛嶧稔以汭泗通氣含靈川阻谷邃呂梁縣濤儻爲
平皋孰險可恃棄德則撓述山川攷弟二

庶靡徐原則壤成賦互之麥菽相土藝樹毋滋異種未利
是鶩謹爾蓋臧敬供歲輸述田賦攷弟三

醫桑旣浮芟撻用修螿穴不愼潰爲洪流桓桓靳公翊贊
睿謀石菑肇建實勤大猷述河防攷弟四

明禋雩祭報功川麓敬供秩祀勿詔勿黷亦有哲人捍患
勤收具歆嘉薦降爾遐福述祠祀攷弟五

清泗之源實始鄒魯統道承流蔚爲文圖鏘鏘瓊珉峩峩
章甫遵業潤色於是道古述學校攷弟六

壘且高矣民且勞矣紛入保矣庶無潰逃矣公家昔營趨

役有程毋荒厥時毋隳厥成述建置攷弟七

鄉有同卒有伍宋日軍唐日府鎮巖圍鷓城虎戢姦究蒞
神武述兵防攷弟八

山之岑澗之濱一詠一嘯慨懷幽人荒堞故壘梵跡仙塵
綴以古藻文采軼倫述古蹟攷弟九

中壘遺編爰有七略羣儒嗣音彬彬述作在昔泯亂放散
紕錯紕紀篇簡贈我渠襲述經籍攷弟十

潛輝幽隧襲珍巖阿片石之胎神物捋呵宣昭往懿詮正
史譎泗亭泐銘鴻文不磨述碑碣攷弟十一

惟牟惟袁實號良牧羣公惠閭齊軌共載瘁躬保障殫心
育鞠懷我風愛奉嘗尸祝述宦績傳弟一

邳山降靈篤生俊哲瓊采特達允矣邦傑或出或處砥行
植節綜括栽林遐邇世繼揚風醜流景屬前烈述人物傳

第二

婦德無名邁閔乃章艱貞蹈義風烈郁芳具昭幽巖備采
敦史述列女傳弟三

迹異間旌軼事齊諧倣詭亦寓美刺述志餘弟四

敢詡精研敢嘗舊編援證典記諮諏里賢端緒絲錯襲沿
變遷或舛或囿大雅繩愆述敘錄弟五

國朝常州駢體文錄卷第二十